



basic education

Department:
Basic Education
REPUBLIC OF SOUTH AFRICA

NATIONAL SENIOR CERTIFICATE

KREITI YA 12

SEPEDI LELEME LA GAE (HL)

LEPHEPHE LA PELE (P1)

DIBATSELA 2022

MEPUTSO: 70

NAKO: Diiri tše 2

Palomoka ya matlakala a dipotšišo ke 10.

DITAELO LE TSHEDIMOŠO

1. Lephephe le, le arotšwe ka DIKAROLO TŠE THARO, e lego YA A, YA B le YA C.

KAROLO YA A:	Tekatlhaologanyo	(30)
KAROLO YA B:	Kakaretšo	(10)
KAROLO YA C:	Dibopego le melao ya tšomišo ya polelo	(30)

2. Bala dtaelo KA MOKA ka tlhokomelo.
3. Araba dipotšišo KA MOKA.
4. Thoma KAROLO YE NNGWE le YE NNGWE letlakaleng LE LEFSA.
5. Thala mothalo ka morago ga KAROLO YE NNGWE le YE NNGWE.
6. Dikarabo di nomorwe go swana le dipotšišo.
7. Tshela mothalo ka morago ga karabo YE NNGWE le YE NNGWE.
8. Hlokomela mopeleto le tlhamo ya mafoko.
9. Nako yeo e akanywago ge go arabja lephephe le e ka ba ka tsela ye:

KAROLO YA A:	Metsotso ye e ka bago ye 50
KAROLO YA B:	Metsotso ye e ka bago ye 30
KAROLO YA C:	Metsotso ye e ka bago ye 40
10. Ngwala ka bothakga le ka mongwalo wa go balega.

KAROLO YA A: TEKATLHAOLOGANYO**POTŠIŠO YA 1**

- 1.1 Bala ka tlhokomelo setšweletšwa sa ka tlase gore o kgone go araba dipotšišo tša go latela.

SETŠWELETŠWA SA A**BOHЛАLE BO TŠWA LEBADING**

- | | | |
|---|--|---------------------------|
| 1 | Mogologolo o boletše a re: 'Ye maswi ga e itswale.' Ba lapa la Lehumo e be e le batsebalegi ka ge ba be ba lle puku gomme ba thuša bana ba bantši motseng wa gabobona go tšwetša dithuto tša bona pele. Ba be ba šegofaditšwe ka bana ba babedi, e lego Khutšo le Mahlatse bao le bona ba bego ba šetše ba le dithutong tša yunibesithi. Nnete bophelo o ka se bo phekole e se thokgola. Lehumo le mosadi ba ile ba amega kotsing ya sefatanaga mo ba ilego ba neela moyo le semeetseng. Morago ga poloko ramolao Makhina o ile a balela bana ba Lehumo <i>wili</i> mo hlame a ilego a boa le sa gagwe mola mogolodi le yena a boile le sa gagwe. Yo mongwe le yo mongwe o be a abetšwe tšelete ya go balelwa go diranta tše milione le seripa gammogo le dithoto tše dingwe. Ramolao o ile a ba eletša gore ba tšwetše dithuto tša bona pele gore ba tle ba kgone go phela gabotse. O ba nyaketše gape le moeletši wa tša mašeleng. | 5
10
15
20
25 |
| 2 | Ka morago ga dikgwedi di se kae diakhaonte tša Mahlatse le Khutšo tša thoma go phophoma ka lerwa. Mahlatse o ile a tšea dikeletšo tša ramolao tša gore a hlokomele thuto mola Khutšo yena di ile tša tsena ka mo tša tšwa ka mo ka ge tšelete e be e šetše e mo tagile. O ra tšelete ruri! Ya mo hlakantšha hlogo a se sa swarega le go tseba batho a se sa ba tseba. Khutšo a khutša tabeng tša thuto. Bagwera le makgarebe e be e le ga mantšhaotlogele. O be a re ge a fihla mafelong a go rekiša madila a namela tafola a re, 'Le ka se mphetše.' Makgolo a diranta a be a tla fofa moyeng ya ba sewagodimo motho a itopela. Go tloga moo o tla tlatša tafola ka mabotlelo a mehutahuta a dinotagi gomme gwa nwewa ka go rata. | 15
20
25 |
| 3 | Mahlatse o lekile go mo eletša ya ba fela go tšhela leswika ka meetse. Difatanaga a reka boka ditukwana. A otlela bo <i>Polo R-line</i> , <i>Mini Cooper</i> , <i>BMW</i> le tše dingwe. Beke le beke lapeng la boKhutšo e le modumo wa monatempolaye! Go tlala thaka ye tshese, go galampelwa mabjala a mainaina. Re rile re re ke ditlabonyane ya ba ke ditlaboima. Modumo wa se sa ba wa mafelelo a beke fela ya ba wa tšatši le lengwe le le lengwe. Baagišane ba rile re a bolela, ba botšwa tše ba di ilego ka ngwaga wa tlala. Lapa lela la go hlomphega la fetoga borolokelo bja bašemane le banenyana. | 30 |

4	Go rile go tla senyega ya ba ge a thoma go ikgweranya le diokobatši, tšelete e lewa boka dithetlwa, a rekela le bagwera ba gagwe. O be a kgora le go ba lefela pese ya go ya mafelong a boithabišo, marobalo, dijо gammogo le dino. Bangwe ba direlwa meletlo ya matswalo ntle le go ntšha pene. Mogale a' Khutšo o be a bile a bolela a re, 'Ke a ja, ke a nwa, ke tla re ke sa nyakang? Yo a nago le pelaelo a a hwe!' O be a sa itire motho wa batho o be a hlakantšhwа bjaša ke tšhipi ya boramošweu selotwapotleng.	35
5	Mogologolo o boletše a re: 'Se se sa felego se a hlola.' Kgwarana lela le ile la thoma go sesefala, a thoma go rekiša dithoto tšela go fihlela a se sa ba le sello. A lewa ke dihlong ka ge a be a thomile go phela ka go kgopela. Mohumi yola wa go huma le dinala a fetoga modiidi wa go hloka le pudi ya leleme le letala. Motšitšhi wola wa bagwera ba go tlala pese a bego a ba rekela madila ba thomile go mo katoga. Ge a ba kgopela thušo ba mmitša sepharelankong sa go se kgone go šomiša tšelete.	45
6	Mahlatse yena gabjale ke <i>Chartered Accountant</i> , o phela gabotse ebile o šoma femeng ya go tuma ya go lefa gabotse. Khutšo ge a mo lebelela o a swaba ebile o tlala ka boitsholo. O duma e ke a ka boetša nako morago fela seo ke toro. Diaparo ke mankgeretla, yena le meetse ke katse le legotlo ebile o iphetošitše segaswi ka ge a sesella le mebila ka gore o be a bile a rekišitše ntlo yela ya kgoparara ya batswadi ba gagwe. Mahlatse o tshepiša go mo thuša fela ge a ka boela sekolong go tšwetša dithuto tša gagwe pele. Khutšo le yena ka go bona gore o a hlaka, o tshepiša go boela sekolong. Aowa, re tla re re ke dipitsi ra bona ka mebala!	60

[Mothopo: Boitlhame]

- 1.1.1 Go tšwa temaneng ya 1 tsopola dika tše di hlalošago go re:
- (a) Ba lapa la Lehumo ba be ba rutegile.
 - (b) Ba ile ba hlokofala. (2)
- 1.1.2 Laetša dilo TŠE PEDI tše di utollago gore Lehumo le mosadi wa gagwe e be e le batho ba go rata thuto go tšwa temaneng ya 1. (2)
- 1.1.3 Bapetša Mahlatse le Khutšo go ya ka diteng tša temana ya 2. (2)
- 1.1.4 Akaretša diteng tša temana ya 3 ka dintlhа TŠE PEDI. (2)
- 1.1.5 Efa dintlhа TŠE PEDI go tšwa temaneng ya 4 tše di laetšago gore Khutšo o be a sa tsebe mohola wa tšelete. (2)
- 1.1.6 Ka dintlhа TŠE PEDI hlatholla kotsi ye e ka welago Khutšo ka go ikgweranya le diokobatši. (2)

- 1.1.7 Ke ka lebaka la eng Khutšo a duma ge nkabe nako e boela morago? Efa dintlha TŠE PEDI. (2)
- 1.1.8 Ke thuto efe yeo re e hwetšago go tšwa temaneng ya 5? Tiiša karabo ya gago ka lebaka. (2)
- 1.1.9 Ge o be o le Khutšo o be o ka dira eng sa go fapano le seo a se dirilego setšweletšweng se? Efa dintlha TŠE PEDI. (2)
- 1.1.10 Maikutlo a gago ke afe mabapi le diteng tša temana ya 6? Fahlela karabo ya gago. (2)
- 1.2 Lekodišiša diswantšho tša ka tlase gore o kgone go araba dipotšišo.

SETŠWELETŠWA SA B



[Mothopo: www.istockphoto.com]

- 1.2.1 Ka dintlha TŠE PEDI, efa ditiragalo tša SETŠWELETŠWA SA B. (2)
- 1.2.2 Bapetša diteng tša SETŠWELETŠWA SA A TEMANENG YA 3 le SETŠWELETŠWA SA B FOREIMING YA A. (2)
- 1.2.3 Ke eng se se laetšago gore lesogana le le lego SETŠWELETŠWENG SA B FOREIMING YA B le a hlaka? (1)
- 1.2.4 Kgetha karabo ya maleba. Ke ditlamorago dife tše bafsa ba ba lego SETŠWELETŠWENG SA B FOREIMING YA A ba ka itemogelago tšona?

- A Lethabo
- B Katlego
- C Dintwa
- D Lerato

(1)

- 1.2.5 Ka dintlha TŠE PEDI hlaloša gore ke thušo efe ye e ka fiwago lesogana le le lego SETŠWELETŠWENG SA B FOREIMING YA B. (2)
- 1.2.6 Na o a dumela gore ga go na boithabišo ntle le dinotagi? Fahlela ka dintlha TŠE PEDI o lebeletše SETŠWELETŠWA SA B FOREIMI YA A. (2)

PALOMOKA YA KAROLO YA A: **30**

KAROLO YA B: KAKARETŠO

POTŠIŠO YA 2

Akaretša setšweletšwa se sa ka tlase ka mantšu a gago ka go kgoboketša dikgopolokgolo tše di laetšago ditlamorago tše di lebanago le tšona ge di sa obamele molao wa Tshireletšo ya Tshedimošo ya Batho.

ELA HLOKO:

1. Kakaretšo ya gago e be le dintlha tše 7 gomme e se fete mantšu a 90.
2. Ngwala ka tsela ya temana.
3. Se ngwale hlogo ya kakaretšo.
4. Bontšha palo ya mantšu mafelelong a kakaretšo.
5. Kakaretšo e be ka mantšu a gago.

SETŠWELETŠWA SA C

TŠHIRELETŠO YA TSHEDIMOŠO YA BATHO

Ka ngwaga wa 2021 mmušo o tsebagaditše molao wo o lebanego le Tshireletšo ya Tshedimošo ya Batho (*Protection of Personal Information Act*). Maikemišetšomagolo a molao wo ke go laola dikhamphane kgahlanong le phatlalatšo ya tshedimošo ya batho ntle le tumelelo ya bona. Tshedimošo ye e ka ba ye motho a e tšweleeditšego ge a reka se sengwe dikgokaganong tša leago goba a tlatša diforomo tše itšego. Molao wo o šireletša tshedimošo ya batho, dikhamphane le mekgatlo ye mengwe ka Afrika-Borwa. O theilwe godimo ga karolo ya 14 ya molaatheo ye e rego motho yo mongwe le yo mongwe o na le tokelo ya sephiri. Dikhamphane di ka lahlegelwa ke bathekgi ge di ka phatlalatša tshedimošo ya batho ntle le tumelelo ya bona.

Dikhamphane tše di sa obamelego molao wo wa Tshireletšo ya Tshedimošo ya Batho (*POPIA*) di ka loba tšhelete ye ntši ka ge ba ka di iša dikgorongtsheko mo di ka fetšago di otlwa dimilione tša diranta. Bengdikhamphane ba ka efoga seo ka go se phatlalatše tshedimošo ya batho. Ge dikhamphane di sa šireletše tshedimošo ya batho, seriti sa tšona se ka fefoga ka ge bathekgi ba tla be ba sa di bolele gabotse. Setšhaba se ka feleletša se hloka tshepo go tšona.

Dikhamphane di ka tšeelwa mangwalo a kgwebo gomme tša lahlegelwa ke letseno ka ge di tla be di sa obamele *POPIA*. Bengdikhamphane ba ka feleletša ba rometšwe ntlwanaswi mengwaga ye lesome. Go phatlalatša tshedimošo ya batho mo go sego molaong go ka tsentšha batho dikgokaganong tše ba sa di letelago le batho ba ba sa ba tsebego. Ba ka ikhwetša ba le mathateng ka ge tshedimošo ya bona e tla be e šomišwa bošaedi ka lebaka la go hloka šedi ga dikhamphane tše.

Motho yo mongwe le yo mongwe o nyaka go tsenela tša kgwebo le motho yo a mo tshepago. Dikhamphane tše di ratago go gokagoketša bathekgi ka bontši di swanetše go obamela *POPIA* ka gore ge di ka se dire bjalo maina a tšona a tla tšhilafala gomme tša hloka bathekgi. Go bohlokwa gore bengdikhamphane ba obamele (*POPIA*) go tšwetša pele le go šireletša dikgwebo tša bona.

[Mothopo: Boitlhamele bjo bo nago le dinyakišo]

KAROLO YA C: DIBOPEGO LE MELAO YA TŠHOMIŠO YA POLELO

- Dithekniki tša papatšo le khathune.
- Tlotlontšu le tšhomiso ya polelo.
- Dibopego tša lefoko.
- Temogo ya tšhomiso ya polelo ka tsinkelo.

POTŠIŠO YA 3

Lebelediša papatšo ye ya ka tlase gore o tle o kgone go laetša mabokgoni a tlhathollo ya ditšweletšwa tša go balwa le go bogelwa ka go araba dipotšišo.

SETŠWELETŠWA SA D

3.1 Kgetha karabo ya maleba. Papatšo ye e lebišitšwe go:

- | | |
|-------------|-----|
| A Barutwana | |
| B Bašomi | |
| C Dimpša | |
| D Baoki | (1) |

3.2 Tsopola polelo ya go jabetša go tšwa papatšong. (1)


3.3 Šomiša 'bogale' le 'mošomo' go hlaola 'mpša' le 'dieta' papatšong. (2)

- 3.4 Hlaloša gore ke ka lebaka la eng mmapatši a šomišitše ditlhaka tše dikgolo lentšung le 'BOVA'. Fahlela ka dintlha TŠE PEDI. (2)
- 3.5 Hlatholla ka fao tšomiso ya thekniki ya seswantšho e nago le khuetšo ya go gokagoketša bareki. Efa dintlha TŠE PEDI. (2)
- 3.6 Na o a dumela gore mantšu a: 'RWALA BOVA, O ŠIRELETŠEGE!' ke selokene sa papatšo ye? Fahlela ka dintlha TŠE PEDI. (2) [10]

POTŠIŠO YA 4

Lebelediša khathune ye ya ka tlase gore o tle o kgone go laetša mabokgoni a tlhathollo ya ditšweletšwa tša go balwa le go bogelwa ka go araba dipotšišo.

SETŠWELETŠWA SA E



[Mothopo: www.garyvarvel.com]

- 4.1 Kgetha karabo ya maleba. Mokgalabje yo a dutšego fase ke ...
- A mokgopedi.
 - B moopedi.
 - C moraloki.
 - D mošomi. (1)
- 4.2 4.2.1 Efa lelatodi la tiragalo ye e dirwago ke mosadi khathuneng ye. (1)
- 4.2.2 Ngwala nyenyefatšo ya seaparo se se lego hlogong ya ngwana. (1)

- 4.3 Akaretša molaetša wa khathune ye. (1)
- 4.4 Laetša tswalano gare ga sefahlego sa mosadi le sebopego sa PUDULA YA 1. (2)
- 4.5 Akanya maemo a boso o lebeletše batho ba ba tšwelelago khathuneng. Fahlela ka ntlha E TEE. (2)
- 4.6 Akanya maikutlo a seboledi PUDULENG YA 2. Fahlela ka ntlha E TEE. (2)
- [10]**

POTŠIŠO YA 5

Badišiša setšweletšwa se sa ka tlase gore o tle o kgone go laetša mabokgoni a kwešišo ya dibopego le melao ya tšhomiso ya polelo ka go araba dipotšišo.

SETŠWELETŠWA SA F

MOHOLA WA DIAPARO TŠA SEKOLO

Mehleng ya lehono diaparo tša fešene di fetogile sekā sa go laetša maemo le go hlalefa go bana ba bantši. Diaparo tša sekolo tšona di dira gore barutwana ba swane le go lekana. Di hlatloša maemo a sekolo, di fokotša dintwa le go se kwane gare ga barutwana. Di fokotša boganka barutwaneng ba bangwe tša ba hlokiša sebaka sa go kgetholla ba bangwe go ya ka diaparo tšeob ba di aparago. Di bjala moyā wa boitshepo 5 le botee gare ga barutwana. Barutwana ba tlogela go inyatša mabapi le tebelelego le maemo a bona. Ka tsela ye ba efoga kgatelelo ya sethaka gomme ba kgona go hlokemediša le go nepiša dithuto tša bona.

Barutwana ba boloka nako ka ge ba tseba seo ba swanetšego go se apara ntłe le go senya nako ka go hlwa ba kgetha seo ba ka se aparago. Batswadi le bona ga ba tshwenyege ka seo bana ba bona ba tlogo se apara. **Diaparo tša sekolo di bolokela batswadi tšelete.** 10

Di dira gore barutwana ba ikgantšhe ka sekolo sa bona le go se botegela. Di godiša moyā wa tšomisano le thekgano gomme se se bonala kudu ka nako ya diphadišano tša dipapadi ge ba phadišana le dikolo tše dingwe. Barutwana ba **ipopa** ngatana e tee 15 gomme ba thekga sekolo sa bona.

[Mothopo: Boitlhamelo]

- 5.1 Go tšwa temaneng ya 1 tsopola lehlathi o be o hlaloše tirišo ya lona. (2)
- 5.2 Efa tirišo ya mašala a a thaletšwego. (2)
- 5.3 Go tšwa temaneng ya 2 šomiša lentšu le 'tseba' lefokong bjalo ka leina o be o fe le lehlalošetšagotee la leina le. (2)
- 5.4 Ngwala gore lefoko le le kotofaditšwego ke la modirišo ofe o be o le fetolele go modirišokgonego. (2)
- 5.5 Ahlaahla tirišo ya lediri le le kotofaditšwego temaneng ya 3. (2)
- [10]**

PALOMOKA YA KAROLO YA C:	30
PALOMOKA YA TLHAHLOBO:	70